



3. Marts 2011

Inatsisartut suleriaasianni § 37, immikkoortoq 1 naapertorlugu matumuuna imaattumik Naalakkersuisunut apeqquteqarpugut:

Apeqqut: Kangerlussuup sineriaata ilaani "Tatsip Ataani" kikkunnik takornarialerisut qamutit motorillit atorlugit angalasoqarsinnaanera akuerineqarsimanersoq?

(Inatsisartuni ilaasortat, Siverth K. Heilmann, Knud Kristiansen, ATASSUT)

Tungavilersuut:

Innuttaasunut ataatsimiititsinermi paasitineqarpugut, siorna 2010-ip ukiaani Kangerlussuup nunataani "Tatsip Ataani" takornarialerisut naammattoorneqarsimasut, qamutit motorillit "4-hjul-inik" taaneqartartut atorlugit ingerlarsoqattaartut.

Ilisimaneqartutuut nuna tamanna qangarsuarniilli aavartartutoqarsuarnik aasivigineqartarluni manna tikillugu najorneqartuartoq.

Takornariat siuarsarniarlugit takornarialerisullu aningaasarsiorfissaasa annertusarneqarnissaat pissusissamisoortutut isigilluinnarparput, taamaattorli susasaqartut tamaasa peqatigilluinnarlugit paaseqatigiiffiullunilu pilersaarusiortarnissaa saneqqunneqarsinnaanngitsoq naqissuserusullugu.

Taamaattumik ATASSUT-miit paaserusupparput, qulaani qamutit motorillit atorlugit angalaarnermi kikkut akuersissummik tunniussaqaarsimanersut? Tusakkammi malillugit piniartut peqatigiiffiat nunaqarfinni aqutsisut il.il. tusarniarneqaarsimanngillat.

Inussiarnersumik Inuulluaqqusilluta

Atassut sinnerlugu Inatsisartuni ilaasortat